

四庫全書

子部

# 欽定四庫全書

子部

神農本草經疏卷二十二至

詳校官太醫院吏目臣周世泰

編修臣倉聖脈覆勘

總校官進士臣繆琪

校對官中書臣吳俊

謄錄監生臣左振麟

謄錄監生臣汪大梓

欽定四庫全書

神農本草經疏卷二十

明 繆希雍 撰

蟲魚部上品

總五十種今疏其要者十三種

石蜜

蜜蠟

牡蠣

龜甲

珍珠

瑇瑁

桑螵蛸

石決明

文蛤

蠡魚

鯽魚

鱖

鯉魚膽

肉鱗附

石蜜味甘平無毒微溫主心腹邪氣諸驚癇瘥安五藏諸不足益氣補中止痛解毒除衆病和百藥養脾氣除心煩食飲不下止腸澼肌中疼痛口瘡明耳目久服強志輕身不饑不老延年神仙

瘥作瘥

疏○石蜜蜂採百花釀成故本經味甘氣平別錄微溫無毒得草木羣英之精華合露氣以釀成故其氣

清和其味純甘施之精神氣血虛實寒熱陰陽內外  
諸病罔不相宜經曰裏不足者以甘補之甘為土化  
土為萬物之母石蜜具天地間至甘之味故能安五  
藏諸不足及益氣補中除衆病也心經有熱則為諸  
驚癇瘧得甘緩之氣則心火降煩熱除諸驚癇瘧平  
矣諸痛癢瘡瘍皆屬心火故又能止肌中疼痛及口  
瘡也甘主解毒故能和百藥甘主入脾故能養脾氣  
脾氣得所養而飲食自下腸辟止矣五臟足氣血充

則耳目聰明不饑不老輕身強志延年神仙所自來  
矣

主治參互

同蘆根汁梨汁人乳牛羊乳童便治噎膈大便燥結  
用此潤之有痰加竹瀝 煉熟和諸丸藥及膏子主  
潤五藏益血脈調脾胃通三焦塗火灼瘡能緩痛

仲景方蜜導煎治陽明病自汗小便反利大便鞭者  
用蜜一合銅器中微火熬之候凝如飴狀至可丸乘

熱捻作挺令頭銳大如指長寸半許候冷納穀道中  
少頃即通也一法加皂角細末二分攪勻尤速 產  
書產後口渴用熟蜜不計多少熱水調服即止 全  
幼心鑑痘癍作癢難忍抓成瘡及痂欲落不落百花  
膏主之用上等石蜜不拘多少湯和時時以翎刷之  
効 肘後方天行膚瘡頭面及身須臾周匝狀如火  
瘡皆戴白漿隨決隨生不即療數日必死差後瘡癍  
黯色一歲方滅此惡毒之氣深入也用蜜入升麻煎

過數數拭之

簡誤

石蜜雖稱補五藏益脾胃然而生者性寒滑能作泄  
大腸氣虛脫穀不化者不宜用嘔家酒家不宜用中  
滿蠱脹不宜用溼熱脚氣不宜用生者有小毒尤不  
宜食青赤酸者食之令人心煩不可與生葱同食害  
人若與葛苴同食令人利下食蜜飽後不可食鮓令  
人暴亡



蜜蠟味甘微溫無毒主下痢膿血補中續絕傷金瘡益氣不饑耐老 白蠟療久洩癖後重見白膿補絕傷利小兒久服輕身不饑

疏○蠟石蜜之凝結於底者也蜜性緩質柔故主潤臟腑經絡蠟性瀋質堅故能療久痢洩癖後重下膿血也甘能益血補中溫能通行經脈故主續絕傷及金瘡也中得補則氣自益故久服能不饑輕身耐老也男子女人大小內外皆可施而別錄獨云利小兒

者非也

主治參互

得象牙末等能去漏管長肉見象牙條下 得膩粉

珍珠末黃檗末龍腦香鉛丹蛙竹屑慈白猪脊髓治

陰蝕惡瘡 同孩兒茶鉛丹胡粉水龍骨粉霜龍骨

黃檗猪膽汁炙猪脂作膏治內外疔瘡久不愈 金

匱方調氣飲治赤白痢少腹痛不可忍後重或面青

手足俱變者用黃蠟三錢阿膠三錢同溶化入黃連

末五錢攪勻分三次熱服神効 千金方膠蠟湯治  
熱痢及婦人產後下痢用蠟二碁子大阿膠二錢當  
歸二錢半黃連三錢黃檗一錢陳廩米半升水三升煮  
至一升去米入藥煎至一鍾溫服神効

簡誤

火熱暴痢不宜用

牡蠣味鹹平微寒無毒主傷寒寒熱溫瘧洒洒驚恚怒  
氣除拘緩鼠瘻女子帶下赤白除留熱在關節榮衛虛

熱去來不定煩滿止汗心痛氣結止渴除老血潛大小腸止大小便療洩精喉痺咳嗽心脇下痞熱久服強骨

節殺邪鬼延年

貝母為之使得甘草牛膝遠志  
蛇牀子良惡麻黃細辛吳茱萸

疏○牡蠣得海氣結成故其味鹹平氣微寒無毒氣薄味厚陰也降也入足少陰厥陰少陽經其主傷寒寒熱溫瘧洒洒驚恚怒氣留熱在關節去來不定煩滿氣結心痛心脇下痞熱等證皆肝膽二經為病二經冬受寒邪則為傷寒寒熱夏傷於暑則為溫瘧洒

洒邪伏不出則熱在關節去來不定二經邪鬱不散  
則心脇下痞熱邪熱甚則驚恚怒氣煩滿氣結心痛  
此藥味鹹氣寒入二經而除寒熱邪氣則榮衛通拘  
緩和而諸證無不瘳矣少陰有熱則女子為帶下赤  
白男子為洩精解少陰之熱而能斂瀦精氣故主之  
也鹹屬水屬陰而潤下善除一切火熱為病故又能  
止汗止渴及鼠癩喉痺咳嗽也老血者宿血也鹹走  
血而軟堅所以主之其性收斂故能瀦大小腸止大

小便利也腎主骨入腎益精則骨節自強邪本因虛而入肝腎足則鬼邪自去人以腎為根本根本固則年自延矣更能止心脾氣痛消疝瘕積塊癭瘤結核脇下堅滿等證皆寒能除熱鹹能軟堅之功也

主治參互

同生地黃黃耆龍眼五味子酸棗仁麥門冬白芍藥  
伏神黃蘗當歸治心腎虛盜汗 同黃蘗五味子地  
黃山茱萸枸杞子車前子沙苑蒺藜蓮鬚杜仲治夢

遺泄精加牛膝則兼治赤白濁 同地黄黃蘗阿膠  
木耳炒黑香附白芍藥地榆麥門冬續斷青蒿鼈甲  
蒲黃止婦人崩中下血及赤白帶下 仲景方同龍  
骨入柴胡桂枝各湯內取其收斂浮越之陽氣固脫  
而鎮驚更能除胸脇中痞硬 藏器方同麻黃根蛇  
牀子為粉去陰汗 本事方虛勞盜汗牡蠣粉麻黃  
根黃耆等分為末每服二錢水煎服 仲景金匱玉  
函方傷寒傳成百合病如寒無寒如熱無熱欲卧不

卧欲行不行欲食不食口苦小便赤色得藥則吐變  
成渴疾久不瘥者用牡蠣煨二兩栝樓根二兩為細  
末每服方寸匕用米飲調下日三服 古今錄驗方  
水病囊腫牡蠣粉二兩乾姜炮一兩研細冷水調稠  
掃上須臾囊熱如火乾則再上小便利即愈一方用  
葱汁白麵同調小兒不用乾姜 經驗方男女瘰癧  
用牡蠣粉四兩玄參末三兩甘草一兩麵糊丸梧子  
大每三十九酒下日三服服盡除根不拘已破未破



皆効 普濟方月水不止牡蠣煨研細米醋搜成團  
再煨研末以米醋調艾葉末熬膏丸梧子大每用醋  
湯下四五十丸

簡誤

凡病虛而多熱者宜用虛而有寒者忌之腎虛無火  
精寒自出者非宜

龜甲味鹹甘平有毒主漏下赤白破癥瘕瘡五痔陰  
蝕溼痺四肢重弱小兒顛不合頭瘡難燥女子陰瘡驚

患氣心腹痛不可久立骨中寒熱傷寒勞復或肌體寒熱欲死以作湯良久服輕身不饑益氣資智亦使人能食勿令中溼中溼即有毒

疏○介蟲三百六十而龜為之長稟金水之氣故味鹹而甘氣平其性神靈能變化凡入藥勿令中溼中溼則遂其變化之性而成癥瘕於腹中故言有毒也氣味俱陰入足少陰經方家多入補心藥用以心藏神而龜性有神借其氣以相通且得水火既濟之義

實非補心之正藥也其主骨中寒熱及傷寒勞復肌  
體寒熱欲死痲瘡者皆陰虛而邪熱為病經曰傷於  
溼者下先受之溼痺四肢重弱亦腎陰虛而邪氣易  
犯腎主骨腎虛則小兒顛門不合腎為五臟陰中之  
陰陰虛則火熱偏至而為驚恚氣心腹痛此藥補腎  
家之真陰則火氣自降而寒熱邪氣俱除矣益陰除  
熱軟堅故主漏下赤白癥瘕五痔陰蝕陰瘡及小兒  
頭瘡也經曰邪熱不殺穀熱去故令人能食能食則

脾胃得所養而能思思作睿故資智久服益氣輕身  
不饑者除熱益陰之功也

主治參互

丹溪方補陰丸用龜下甲酒炙熟地黃蒸曬各六兩  
黃蘗知母各四兩為末以猪脊髓和丸梧子大每百  
丸空心溫酒下 摘玄方治產三五日不下垂死及  
短小女子交骨不開者用乾龜殼一箇酥炙頭髮一  
握燒灰川芎當歸各一兩為末和勻每服七錢水煎

服如人行五里許再一服生胎死胎俱下

簡誤

按龜鼈二甲本經所主大畧相似今人有喜用鼈甲惡用龜甲者有喜用龜甲惡用鼈甲者皆一偏之見也二者咸至陰之物鼈甲走肝益腎以除熱龜甲通心入腎以滋陰第鼈甲無毒可多用龜甲非千年自死者則有毒故方書所用曰敗龜板者取其長年則得陰氣多故有益陰之功用耳若今新剖之甲斷乎

有毒不宜頻使用者不可不詳辨也妊婦不宜用病人虛而無熱者不宜用凡入藥須研極細不爾留滯腸胃能變癥瘕也

珍珠寒無毒主手足皮膚逆臚鎮心綿裏塞耳主聾傳面令人潤澤好顏色粉點目中主膚醫障膜

疏○珠稟太陰之精氣而結故中秋無月則蚌無胎其體光明其性堅硬大小無定要以新完未經鎖綴者為上味甘微鹹氣寒無毒入手少陰足厥陰經心

虛有熱則神氣浮越肝虛有熱則目生膚翳障膜除  
二經之熱故能鎮心去目中障翳也耳聾本屬腎虛  
有熱所以主之逆臚者臚脹也胸腹脹滿氣逆以及  
於手足皮膚皆腫也經云諸溼腫滿屬脾土又云諸  
腹脹大皆屬於熱此因脾虛有熱兼有積滯所致珍  
珠味甘亦能益脾氣寒能除熱體堅能磨積消滯故  
主手足皮膚逆臚也古人未發斯義所以方書叙論  
不詳亦為闕畧也珠藏於澤則川自媚况塗面寧不

令人潤澤好顏色乎凡小兒驚熱風癩為必須之藥

主治參互

同丹砂牛黃犀角天竺黃茯神遠志鈎藤鈎琥珀金箔治小兒驚癩風熱大人失志癲狂等證 同爐甘

石龍腦香白礪砂空青人爪點目能去腎障 同鍾

乳石象牙末牛黃冰片白殭蠶紅鉛天靈蓋蛙竹屑樺皮灰沒藥明礬治廣瘡結毒及陰蝕瘡有奇効

同人中白黃檗青黛礪砂和冰片少許治口疳加入



雞內金膩粉治下疳 格古論灰塵迷目用大珠挹  
之則消 千金方婦人難產或胞衣不下珍珠末一  
兩酒服立出 聖惠方肝虛目暗珍珠末一兩白蜜  
二合鯉魚膽二枚和合銅器煎至減半新綿濾過瓶  
盛頻點取瘥 痘瘡發疔毒方見穀部豌豆下

簡誤

珍珠體最堅硬研如飛麵方堪服食不細能傷人臟  
腑病不由火熱者勿用

璚瑁寒無毒主解嶺南百藥毒 一名玳瑁

疏○璚瑁龜類也得水中至陰之氣故氣寒無毒而解一切熱毒其性最靈凡遇飲食有毒則必自搖動然須用生者乃靈死者則不能矣嶺南人善以諸毒藥造成蠱人中之則昏憤悶亂九竅流血而死惟用活璚瑁刺其血飲或生者磨濃汁服之可解日華子主破癥結消癰腫止驚癇陳士良主心風解煩熱行氣血利大小腸以其性稟純陰氣味至寒故治如是

等病也又能解痘毒神効

主治參互

楊氏產乳方解一切蠱毒生玳瑁磨濃汁服一盞即  
消 靈苑方預解痘毒遇時行痘癩服此未發內消  
已發稀少用生玳瑁生犀角各磨濃汁一合和勻溫  
服半合日三最良 聞人規痘癩論痘癩黑陷乃心  
熱血凝也法同上加入猪心血少許紫草汁五匙和  
勻溫服 鴻飛集迎風目淚乃肝腎虛熱也用生玳

瑁羚羊角各一兩石燕一雙為末每一錢薄荷湯下

日三服

簡誤

痘瘡虛寒不起發者不宜服

桑螵蛸味鹹甘平無毒主傷中疝瘕陰痿益精生子女  
子血閉腰痛通五淋利小便水道又療男子虛損五臟  
氣微夢寐失精遺溺久服益氣養神二月三月採蒸之  
當火炙不爾令人洩

疏○桑螵蛸桑樹上螳螂子也稟秋金之陰氣兼得  
桑木之津液本經味鹹氣平別錄甘無毒氣薄味厚  
陰也入足少陰太陽經人以腎為根本男子腎經虛  
損則五臟氣微或陰痿夢寐失精遺溺鹹味屬水內  
合於腎腎得之而陰氣生長故能愈諸疾及益精生  
子也腎與膀胱為表裏腎得所養則膀胱自固氣化  
則能出故利水道通五淋也女子屬陰肝腎用事疝  
瘕血閉腰痛皆二經為病鹹能益陰入血軟堅是以

主之甘能補中故主傷中益氣腎足則水自上升克  
與心交故能養神也

主治參互

外臺祕要虛勞盜汗遺精白濁桑螵蛸炙白龍骨等  
分為細末每服二錢空心鹽湯下 寇宗奭方桑螵  
蛸散治男子房勞小便日數十次如稠米泔心神恍  
惚瘦瘁食減其藥安神魂定心志治健忘補心氣止  
小便數用桑螵蛸遠志龍骨菖蒲人參茯神當歸龜

甲各如法製各一兩為末卧時人參湯調下二錢  
千金翼婦人遺尿桑螵蛸酒炒為末白湯服二錢兼  
治胎前產後遺尿不禁

簡誤

桑螵蛸氣味雖鹹平走腎利水道然得秋時收斂之  
氣凡失精遺溺火氣太盛者宜少少用之

石決明味鹹平無毒主目障腎痛青盲久服益精輕身

凡用以麪裹煨熟磨去粗皮搗細如飛麪方堪  
入藥一名千里光得龍骨療洩精畏旋覆花

疏○石決明得水中之陰氣以生故其味鹹氣應寒無毒乃足厥陰經藥也足厥陰開竅於目目得血而能視血虛有熱則青盲赤痛障翳生焉鹹寒入血除熱所以能主諸目疾也鹹寒又能入腎補陰故久服益精輕身也研細水飛主點外障翳

主治參互

得甘菊花生地黃木賊草穀精草羚羊角人爪蟬蛻空青蜜蒙花決明子夜明沙治青盲障翳 明目集



驗方羞明怕日用千里光甘菊花甘草各二錢水煎  
冷服 鴻飛集痘後目醫用石決明火煨研穀精草  
各等分為細末以猪肝蘸食 目疾外用甚稀故  
無簡誤

文蛤味鹹平無毒主惡瘡蝕五痔欬逆胸痺腰痛脇急  
鼠瘻大孔出血崩中漏下

疏○文蛤即花蛤大小背上有斑文得陰水之氣故  
其味鹹氣平無毒經曰硬則氣堅鹹以軟之文蛤之

鹹能消散上下結氣故主效逆胸痺腰痛脇急也惡  
瘡蝕五痔鼠瘻大孔出血崩中漏下皆血熱為病鹹  
平入血除熱故主之也更能止煩渴化痰利小便

主治參互

仲景方傷寒在陽當以汗解反以冷水噀之或灌之  
其熱被却不得去更益煩熱皮上粟起欲飲水反不  
渴者文蛤散主之文蛤五兩為末每服方寸匕沸湯  
下甚効 千金翼疔蝕口鼻數日欲盡文蛤燒灰以

臘猪脂和塗之

簡誤

病屬邪熱痰結者宜之氣虛有寒者不得用

蠡魚味甘寒無毒主溼痺面目浮腫下大水療五痔有瘡者不可食令人癩白

疏○蠡魚稟北方玄水之精得中央陰土之氣故其色黑味甘氣寒無毒乃益脾除水之要藥也土虛則水泛濫土堅則水自清凡治浮腫之藥或專於利水

或專於補脾其性各自為用惟鱘魚色黑象水能從其類以導橫流之勢味甘上化能補其不足以遂敦阜之性補瀉兼施故主下大小及溼痺面目浮腫有神効也五痔因溼熱所生水去則溼氣自除今世俗小兒痘後咸食之然而早食多食能令皮膚癩痕皆黑本草獨云有瘡者食之令人癩白非也孟詵主下大小便壅塞氣作鱸與脚氣風氣人食良蘇頌主妊娠有水氣竝取其除溼下水益脾之功也

主治參互

同白朮茯苓橘皮姜皮煮食下水腫大効 與蒜作  
鱠食能去溼下水食醫心鏡治十種水氣垂死蠱魚  
一斤重者煮汁和冬瓜葱白作羹食 靈苑方喉痺  
將死者以蠱魚膽點入少許即差病深者水調灌之  
諸魚膽皆苦惟此膽甘可食為異耳

簡誤

蠱魚其功專於去溼下水他開無所長且多食能發

痼疾不可不知也

鯽魚合蓴作羹主胃弱不下食作鱠主久赤白痢燒灰塗諸瘡或取猪脂煎用又主腸癰

疏○鯽魚稟土氣以生故其味甘其氣溫無毒是以能入胃治胃弱不下食入大腸治赤白久痢腸癰脾胃主肌肉甘溫能益脾主肌故主諸瘡久不瘥也藏器主虛羸大明主溫中下氣孟詵云調中益五臟表其益脾和胃之功也

主治參互

百一選方腸風下血用活鯽魚一大尾去腸留鱗入  
五倍子末填滿泥固煨存性為末酒服一錢一方入  
白礬末二錢外以椶包更以紙裏煨存性研末每二  
錢米飲下 經驗方膈氣吐食用大鯽魚去腸留鱗  
切大蒜片填滿腹紙包十重泥固曬半乾炭火煨熟  
單取肉用和平胃散一兩杵丸梧子大密藏每服三  
十九米飲下

簡誤

鯽魚調胃實腸與病無礙諸魚之中惟此可常食但  
不宜與沙糖同食生疔蟲同芥菜食成腫疾同猪肝  
雞肉雉肉鹿肉食生癰疽同麥門冬食害人

鯽味甘大溫無毒主補中益血療潘唇

疏○鯽魚得土中之陽氣以生故其味甘氣大溫甘  
溫俱足所以能補中益血甘溫能通經脈療風邪故  
又主潘唇及今人用之以治口眼喎斜也



主治參互

與黃耆同食能益氣力 治火丹赤腫生鱗血塗之

効

簡誤

性熱而補凡病屬虛熱者不宜食時行病後食之多  
復過食動風氣兼令人霍亂

鯉魚膽味苦寒無毒主目熱赤痛青盲目久服強悍  
益志氣

疏○凡膽皆苦寒走厥陰故鯉魚膽亦主明目及目  
熱赤痛青盲也肝為將軍之官腎為作強之官二經  
有熱則虛怯志氣衰苦寒除二經之熱故久服強悍  
益志氣也

鯉魚肉味甘主欬逆上氣黃疸止渴生者主水腫脚  
滿下氣

疏○鯉魚稟陰極之氣故其鱗三十六陰極則陽復  
故素問言魚熱中其氣味雖甘平然多食能令人發

風熱也甘可以緩故主欬逆上氣止渴陰中有陽能  
從其類以導之故能利小便使黃疸水腫脚氣俱消  
也河間云鯉之治水因其氣以相感者是矣

主治叅互

外臺祕要治水腫用大鯉一尾赤小豆一升水二斗  
煮可二升餘瀹去滓頓服盡當下利利盡即瘥并治  
妊娠水腫有神効

鱗主產婦腹痛燒灰酒服亦治血氣雜諸藥用之

疏○魚鱗得水中之陽氣而鯉魚鱗則又稟陰極生陽之數性能入血散滯入血者陰之用也散滯者陽之用也故主婦人產後腹痛及血氣不和等證

主治參互

和劑局方烏金散治產後血迷血暈敗血不止淋瀝不斷臍腹疼痛及崩中下血過多不止鯉魚鱗燒血竭百草霜亂髮灰松墨煨酢淬延胡索當歸赤芍藥等分為末每二錢溫酒下 外臺秘要古今錄療魚

鯉骨橫喉中六七日不出取鯉魚鱗皮燒作屑以水服之即出未出再服

簡誤

六陰已極陽氣初生故能發熱動風風熱病者不宜食天行病後下痢及有宿癥者俱不可食不宜合犬肉葵菜食服天門冬硃砂人不可食凡炙鯉魚不可使烟入目損目光三日內必驗也前和劑局方烏金散方內有肉桂當歸延胡索赤芍藥皆行血之藥而

其所主病內開載崩中下血

關

不止用之則大誤

矣慎之慎之

神農本草經疏卷二十

欽定四庫全書

神農本草經疏卷二十一

明 繆希雍 撰

蟲魚部中品

總五十六種今疏其要者一十七種

蝟皮

露蜂房

鼈甲

蟹

蟬蛻

烏賊魚骨

原蠶蛾

附 蠶沙

蠶退

白殭蠶

鰻鱺魚

蝮蝮并蝮蝮

蜚蠊

麩蟲

青魚膽

石首魚

鱸魚

蝮皮味苦平無毒主五痔陰蝕下血赤白五色血汁不止陰腫痛引腰背酒煮殺之又療腹痛疝積亦燒為灰酒服之得酒良畏桔梗麥門冬

疏○蝮鼠類屬木其皮毛戟刺如鍼屬金故味苦平平即兼辛大腸屬金以類相從故能治大腸溼熱血



熱為病及五痔陰蝕下血赤白五色血汁不止也陰  
腫痛引腰背腹痛疝積皆下焦溼熱邪氣留結所致  
辛以散之苦以泄之故主之也肉味甘平能開胃氣  
止反胃亦主痔瘻腸風

主治參互

同象牙末等治通腸漏見象牙條下 衍義五痔下  
血用蝟皮穿山甲等分燒存性入肉豆蔻一半空心  
米飲下一錢妙 楊氏家藏方腸風下血蝟皮一枚

木賊草半兩炒黑為末每二錢熱酒調下

簡誤

凡食其肉當去骨誤食令人瘦劣諸節漸小也

露蜂房味苦鹹平有毒主驚癇瘈瘲寒熱邪氣癰疾鬼  
精蠱毒腸痔火熬之良又療蜂毒毒腫

疏○蜂性有毒螫人則痛極以其得火氣之甚也故  
蜂房味苦氣平性亦有毒別錄言鹹當作辛鹹辛散  
苦泄鹹可軟堅故主驚癇瘈瘲寒熱邪氣癰疾鬼精

蠱毒腸痔等證也療蜂毒腫者取其氣類相從以  
毒攻毒之義也蘇恭以亂髮蛇皮三物合燒灰酒服  
方寸匕治惡疽附骨癰根在臟腑歷節腫出丁腫惡  
脉諸毒大明煎水漱齒止風蟲疼痛洗乳癰蜂疔惡  
瘡皆取其攻毒散邪殺蟲之功耳

主治參互

子母秘錄臍風溼瘡久不瘥者蜂房燒末傅之効  
袖珍方風蟲牙疼蜂房一枚鹽實孔內燒過研末擦

之鹽湯漱去一方同細辛煎水漱之 又方喉痺腫  
痛露蜂房灰白殭蠶等分為末吹入喉內或用乳香  
湯服半錢 濟衆方女人妬乳乳癰汁不出內結成  
腫名妬乳用蜂房燒灰研末每服二錢水一盞煎六  
分去滓溫服 經驗方治漏痔蜂房燒存性研細摻  
之乾則菜油調傅

簡誤

蜂房主驚癇瘕癰及諸癰疽惡毒正取其攻散邪惡

以毒攻毒之意若病屬氣血虛無外邪者與夫癰疽潰後元氣乏竭者皆不宜服

鼈甲味鹹平無毒主心腹癥瘕堅積寒熱去痞息肉陰蝕痔惡肉療溫瘧血瘕腰痛小兒脇下堅肉味甘主傷中益氣補不足

惡磬石

疏○鼈甲全稟天地至陰之氣故其味鹹平無毒潤下作鹹象水明矣本乎地者親下益陰何疑甲主消散者以其味兼乎平亦辛也鹹能軟堅辛能走散

故本經主癥瘕堅積寒熱去痞疾息肉陰蝕痔核惡  
肉別錄療溫瘧者以瘧必暑邪為病類多陰虛水衰  
之人乃為暑所深中邪入陰分故出併於陽而熱甚  
入併於陰而寒甚元氣虛羸則邪陷而中焦不治甚  
則結為瘕母甲能益陰除熱而消散故為治瘕之要  
藥亦是退勞熱在骨及陰虛往來寒熱之上品血瘕  
腰痛小兒脇下堅皆陰分血病宜其悉主之矣勞復  
女勞復為必需之藥勞瘦骨蒸非此不除產後陰脫

資之尤急

主治參互

仲景蠶甲煎丸治瘧母之要藥得牛膝當歸歸佐以  
橘皮何首烏知母麥門冬治久瘧 同知母石膏麥  
門冬貝母竹葉治溫瘧熱甚渴甚無肺熱病者加人  
參若瘧發熱甚渴甚又寒甚汗多發時指甲黯狀若  
欲死并加桂枝有神去桂枝治痺瘧良 得青蒿麥  
門冬五味子地黃枸杞牛膝治骨蒸勞熱甚則加銀

柴胡地骨皮胡黃連 肉主傷中益氣補不足腹中  
結熱婦人漏下陰虛羸瘦性冷補一切陰虛人宜常  
服之

簡誤

鼈甲妊娠禁用凡陰虛胃弱陰虛泄瀉產後泄瀉產  
後飲食不消不思食及嘔惡等證咸忌之

蟹味鹹寒有毒主胸中邪氣熱結痛喝僻面腫敗漆燒  
之致鼠解結散血愈漆瘡養筋益氣 爪主治破胞墮



胎

疏○蟹稟水氣以生故其味鹹氣寒本經雖云有毒然今人多食之卒無害其有毒者大抵形質怪異如後文所載諸種始有大毒耳外骨肉陰包陽也入足陽明足厥陰經經曰熱淫于內治以鹹寒故主胸中邪氣熱結痛也喎僻者厥陰風熱也面腫者陽明熱壅也解二經之熱則筋得養而氣自益喎僻面腫俱除矣鹹走血而軟堅故能解結散血漆得蟹而化

為水燒之可集鼠于庭此物性之相感相制莫能究其義也愈漆瘡者以其能解漆毒故也爪性迅利故能破胞墮胎也

主治參互

日華子產後肚痛血不下者以酒食之筋骨折傷者生搗炒畧之 陳藏器續斷絕筋骨去殼同黃搗爛微炒納入瘡中筋即連也 寇宗奭小兒解顱不合以蟹螯同白及末搗塗以合為度 唐瑤經驗方骨

節脫離生蟹搗爛以熱酒傾入連飲數碗其查塗半  
日內骨肉谷谷有聲即好 董炳驗方中鱒魚毒食  
蟹即解 胡洽方治孕婦僵仆胎上搶心有蟹爪湯  
千金方神造湯治子死腹中或雙胎一死一生服  
之令死者出生者安神驗用蟹爪一升甘草二尺東  
流水一斗以葦薪煮至二升攄去滓入真阿膠三兩  
令烊頓服或分二服若人困不能服者灌入即活

簡誤

蟹性冷能散血熱為病故跌撲損傷血熱瘀滯者宜之若血因寒凝結與夫脾胃寒滑腹痛喜熱惡寒之人咸不宜食有獨螯獨目兩目相向六足四足腹下有毛腹中有骨頭背有星點足斑目赤者竝有毒不可食能害人被其毒者冬瓜汁紫蘇蒜豉蘆根汁皆可解之不可與柿及荊芥食發霍亂動風木香汁可解

蟬殼味鹹甘寒無毒主小兒癩女人生子不出灰服之

主久痢

一名枯蟬一名金牛兒凡用洗去泥并去翅足漿水煮晒乾用

疏○蟬稟水土之餘氣化而成形其飛鳴又得風露之清氣故能入肝祛風散熱如藥性論主小兒壯熱驚癇是矣其主婦人生子不下者取其蛻脫之義治久痢者以其有甘寒之功也其鳴清響能發音聲其性善蛻能脫翳障其體輕浮能發瘡癬其味甘寒能除風熱故陳藏器主啞病寇宗奭主目昏障翳小兒瘡癬出不快及今人治頭風眩暈皮膚風熱痘癬作

痒疔腫毒瘡大人失音小兒噤風天弔驚哭夜啼等證皆以其有如上諸功能也

主治參互

同羚羊角密蒙花白蒺藜草决明木賊草穀精草甘  
菊花夜明沙生地黃黃連女貞實治目盲障翳 同  
丹砂茯神珍珠牛黃殭蠶天竺黃鈎藤鈎犀角琥珀  
全蝎治小兒風熱急驚癇病 同犀角生地黃紫草  
麥門冬連翹金銀花治痘瘡血熱出不快 同石膏

鼠黏子赤檉木薄荷元參甘草葛根栝樓根麥門冬  
治大人小兒痧癘 普濟方治小兒夜啼不出狀若  
鬼祟以蟬蛻下半截為末每一字鈎藤湯調下或入  
辰砂少許亦可半治天弔驚啼 全幼心鑑痘瘡作

癢蟬蛻三七枚炙甘草各一錢水煎服 錢氏方痘

後目翳蟬蛻為末每一錢羊肝煎湯下日二服 和

劑局方蟬花散治肝經蘊熱風毒之氣內搏上攻眼  
目赤腫翳膜疼痛昏瀋內外障翳咸治之用蟬蛻殼

精草刺蒺藜甘菊花防風草決明蜜蒙花甘草羌活  
黃芩蔓荊子川芎木賊草荊芥等分為末每二錢茶  
清調食後臨臥各一服

簡誤

痘疹虛寒證不得服

烏賊魚骨味鹹微溫無毒主女子漏下赤白經汁血閉  
陰蝕腫痛寒熱癥瘕無子驚氣入腹腹痛環臍陰中寒  
腫令人有子又止瘡多膿汁不燥

一名海螵蛸一名  
烏鰂骨一名墨魚



疏○烏賊魚骨稟水中之陽氣以生故其味鹹氣微  
溫無毒入足厥陰少陰經厥陰為藏血之臟女人以  
血為主虛則漏下赤白或經汁血閉寒熱癥瘕少陰  
為藏精之臟主隱曲之地虛而有溼則陰蝕腫痛虛  
而寒客之則陰中寒腫男子腎虛則精竭無子女子  
肝傷則血枯無孕鹹溫入肝腎通血脈而去寒溼則  
諸證除精血足令人有子也其主驚氣入腹腹痛環  
臍者蓋肝屬木主驚驚入肝膽則榮氣不和故腹痛

環臍也入肝膽舒榮氣故亦主之溫能燥溼故又主瘡多膿汁也按素問云有病胸脇支滿者妨于食病至則先聞腥臊臭出清液先唾血四肢清目眩時時前後血病名曰血枯得之年少時有所大脫血或醉入房中氣竭肝傷故月事衰少不來治之以四烏鯁骨一蘆茹為末丸以雀卵大如小豆每服五丸飲以鮑魚汁所以利腸中及傷肝也觀此則其入厥陰血分為女人崩漏下血之要藥可知矣

主治叅互

聖惠方赤白目翳用烏鰂骨一兩去皮為末入片腦少許點之 澹寮方底耳出膿海螵蛸半錢麝香一字為末以絲杖絞淨吹入 聖惠方小兒臍瘡出血及膿海螵蛸乾臙肢為末油調搽之 聖濟總錄骨鯁在喉烏賊魚骨橘紅焙等分為末寒食麪和錫丸芡子大每一丸含化 簡便單方舌腫出血不止烏賊骨蒲黃各等分炒為末塗之

簡誤

其氣味鹹溫血病多熱者勿用

原蠶蛾雄者有小毒主益精氣強陰道交接不倦亦止  
精

疏○原蠶蛾乃是晚蠶第一番出者其子再復出者  
為二蠶此二蠶之種其蛾性最淫出繭便媾味鹹氣  
溫熱故能強陰益精令交接不倦也日華子主壯陽  
事止泄精尿血暖水臍蓋取其性淫助陽鹹溫入腎

之功耳

主治參互

千金方丈夫陰痿不起未連蠶蛾二升去頭翅足炒  
為末蜜丸梧子大每夜服一丸可御十女以菖蒲酒  
止之 聖濟總錄玉枕生瘡生枕骨上如癰破後如  
筋頭用原蠶蛾炒石葦等分為末乾貼瘡

簡誤

少年陰痿由于失志者不宜用陰虛有火者咸忌之

蠶屎溫無毒主腸鳴熱中消渴風痺癰瘕

即原蠶沙

疏○原蠶沙即晚蠶所出屎也其味辛甘氣溫無毒腸鳴者水火相觸也甘以和之消渴者中氣燥熱也辛以潤之蠶屬火其性燥燥能勝溼去風故其沙主療風溼之病如陳藏器以之炒黃袋盛浸酒去風緩諸節不隨皮膚頑痺腹內宿冷瘕血腰脚冷瘕炒熱熨偏風筋骨癱緩手足不隨等證

主治參互

寇氏法治諸風冷用醇酒三升拌蠶沙五斗甑蒸于  
暖室中鋪油單上令患風冷氣痺及近感癱風人就  
以患處一邊卧沙上厚蓋取汗若虛人須防大熱昏  
悶令露頭面如未全愈間日再作 聖惠方風瘙癢  
癩作痒成瘡用蠶沙一升水五斗煮取二斗去滓洗  
浴避風 儒門事親婦人血崩蠶沙為末酒服三五  
錢

簡誤

癱緩筋骨不隨由于血虛不能榮養經絡而無風溼  
外邪侵犯者不宜服

蠶退主血風病益婦人一名馬明退

近世醫家多用初出蠶子殼在紙上

者東方諸醫用老蠶眠起所蛻皮功用雖相近當以蛻皮為正用之微妙

疏○蠶退如蟬蛻蛇蛻之類各因其本質以為用蠶

退得蠶氣之餘故能治血風病血熱則生風婦人以  
血為主故尤益婦人也近世以之療痘癩去目中翳  
障其義猶蟬蛻也



主治叅互

集驗方走馬牙疳用蠶退紙灰入麝香少許 并

治口瘡 又方治纏喉風蠶蛻紙燒存性蜜丸芡實

大含化嚙津 蠶已出蛾取退煨存性為末服之能

排膿穿毒瘡口

簡誤

婦人血虛無風溼者不宜用

白殭蠶味鹹辛平無毒主小兒驚癇夜啼去三蟲滅黑

默令人面色好男子陰瘍作瘡病女子崩中赤白產後餘

痛滅諸瘡癥痕

疏○蠶屬陽而殭者又兼金木之化本經味鹹別錄  
辛平無毒然詳其用應是辛勝鹹劣氣微溫之藥也  
氣味俱薄浮而升陽也入足厥陰手太陰少陽經厥  
陰為風木之位主藏血小兒驚癇夜啼女子崩中赤  
白風熱乘肝臟也產後餘痛風寒入血分也辛能祛  
散風寒溫能通行血脈故主如上諸證也肺主皮毛

而風邪客之則面色不光潤辛溫入肺去皮膚諸風  
故能滅黥點及諸瘡癩痕令人面色好也男子陰瘍  
風溼浸淫也辛平能散風熱兼能燥溼是以主之三  
蟲亦溼熱所化故又能去三蟲也藥性論治口噤發  
汗日華子主中風失音一切風症小兒客忤男子陰  
痒痛女子帶下蘇頌治風喉痺欲絕元素主皮膚諸  
風如蟲行皆取其性屬陽風熱為陽邪能入皮膚經  
絡發散諸邪熱氣也

主治參互

同丹砂牛黃膽星全蝎麝香鈎藤鈎犀角金箔天竺  
黃蟬蛻治小兒急驚客忤 仁存方開闢散治急喉  
風痺用白殭蠶炒白礬半生半炒等分為末每以一  
錢用竹瀝加姜汁調灌得吐頑痰立効小兒加薄荷  
一方用白梅和丸綿裹含之 聖惠方小兒噤口噤  
風面黃赤氣喘啼聲不出由胎氣挾熱流毒心脾故  
令舌強唇青撮口發噤用白殭蠶二枚去嘴略炒為

末蜜調傅唇中甚効 普濟方治大人頭風及小兒  
驚風並用大蒜七個先燒紅地以蒜逐個于地上磨  
成膏却以殭蠶一兩去頭足安蒜上碗覆一夜勿令  
泄氣只取殭蠶研水每用嚙鼻口內含水有効 又  
方治腹內龜病詩云人間龜病不堪言肚裏生成硬  
似磚自死殭蠶白馬溺不過時刻軟如綿 藥性論  
滅諸瘡癩痕白殭蠶衣魚鷹屎白等分傅之 聖惠  
方癰瘰風瘡疼痛白殭蠶焙研酒服一錢立瘥 小

兒宮氣方小兒口瘡通白者白殭蠶炒為末蜜和傳  
之効兼治風疳蝕瘡

簡誤

殭蠶性辛溫辛能散其功長於祛風化痰散有餘之  
邪凡中風口噤小兒驚癇夜啼由於心虛神魂不寧  
血虛經絡勁急所致而無外邪為病者忌之女子崩  
中產後餘痛非風寒客入者亦不宜用今世治小兒  
驚風不問虛實一概混施誤甚誤甚

鰻鱺魚味甘有毒主五痔瘡癭殺諸蟲

疏○鰻鱺魚稟土中之陰氣故其味甘其氣寒其形類蛇常與水蛇同穴故其性有小毒甘寒而善能殺蟲故骨蒸勞瘵及五痔瘡癭人常食之有大益也燒烟辟蚊熏屋舍竹木斷蛀蟲置骨于衣箱中斷蠹其殺諸蟲之驗可證矣腹下有黑斑背上有白點者毒甚不可食重三四斤及水行昂頭者不可食妊娘食之令胎有疾脾胃薄弱易泄者勿食

蝮蝮味鹹寒無毒主賊風鳴僻軼筋及脫肛驚癩孿縮

蝮蝮味鹹寒無毒主賊風鳴僻腕跌大腸下脫肛筋急

及驚癩

蝮蝮蝮蝮牛本經分二條今按其氣味相同主療無別惟形質稍異故併為一蝮蝮牛負殼蝮蝮無

耳殼

疏○蝮蝮蝮蝮牛稟陰溼之氣而生故味鹹氣寒無毒

經曰清靜則肉腠閉拒雖大風苛毒弗能害也如陰

血虧竭陽氣躁擾則湊理不密賊風乘虛而入風主

搖動中于經絡故鳴僻孿縮軼筋筋急所自來矣又



風為陽邪筋脉得之皆燥急鹹寒能益陰潤燥軟堅  
則筋脉舒緩經絡通達而諸證除矣驚癇者風熱也  
脫肛者大腸熱也脫跌者血脉傷必發熱也鹹寒總  
除諸熱所以主之蜈蚣性畏二物不敢過其所行之  
路觸其身即死故人取以治蜈蚣毒

主治參互

聖惠方治大腸因熱脫肛用蝸牛一兩燒灰猪脂和  
傅立縮 濟生方痔瘡腫痛用蝸牛一枚入麝香少

許以碗盛次日取水塗之丹溪方用蝸牛浸油塗之  
或燒灰傅亦可 集驗方發背初起活蝸牛二百箇  
以新汲水一盞瓶內封一宿取涎水入真蛤粉旋調  
掃傅瘡上日十餘度 大全良方痔熱腫痛用大蛞  
蝓一箇研泥入片腦一字燕脂坯子半錢同傅之

簡誤

其氣大寒非直有風熱者不宜用小兒薄弱多泄者  
不宜用

蜚蚤味苦微寒有毒主逐瘀血破下血積堅痞癥瘕寒熱通利血脉及九竅女子月水不通積聚除賊血在胸腹五臟者及喉痺結塞

一名  
蚤蟲

疏○蜚蚤其用大略與虻蟲相似而此則苦勝苦能泄結性善齧牛馬諸畜血味應有鹹鹹能走血完素云蚤飲血而用以治血故主積聚癥瘕一切血結為病如經所言也苦寒又能泄三焦火邪迫而上壅閉塞咽喉故主喉痺結塞也今人以其有毒多不用然

仲景抵當湯丸大黃廔蟲丸中咸入之以其散臟腑  
宿血結積有神効也凡毒藥之治病如刑罰之治盜  
賊不如是不足以祛邪反正書曰若藥不瞑眩厥疾  
不瘳正此謂也其與病相乖不宜用者詳著簡誤中  
主治參互

入大黃廔蟲丸治虛勞羸瘦腹內有乾血肌膚甲錯  
兩目黯黑 入抵當湯治太陽病身黃脉沈結少腹  
鞭小便自利其人如狂者 備急方撲墜瘀血畜蟲

二十枚牡丹皮一兩為末酒服方寸匕血化為水也

簡誤

傷寒發黃脉沈結少腹鞭如小便不利者為無血證  
非畜血也不宜用瘀血未審的者不宜用女子月水  
不通由于脾胃薄弱肝血枯竭而非血結閉塞者不  
宜用孕婦腹中有癥瘕積聚不宜用凡病氣血虛甚  
形質瘦損者忌之

麈尾味鹹寒有毒主心腹寒熱洗洗血積癥瘕破堅下

血閉生子大良一名地鼈

疏○塵蟲生於下溼土壤之中故其味鹹氣寒得幽暗之氣故其性有小毒以刀斷之中有白汁如漿湊接即連復能行走故今人以之治跌撲損傷續筋骨有奇効乃足厥陰經藥也夫血者身中之真陰也灌漑百骸周流經絡者也血若凝滯則經絡不通陰陽之用互乖而寒熱洗洗生焉鹹寒能入血軟堅故主心腹血積癥瘕血閉諸證血和而榮衛通暢寒熱自

除經脉調勻月事時至而令婦人生子也又治瘧母  
為必用之藥

主治參互

同自然銅血竭乳香沒藥五銖錢黃荆子麻皮灰狗  
頭骨治跌撲損傷神効 仲景方大黃廬蟲丸治產  
婦腹痛有乾血用廬蟲二十枚去足桃仁二十枚大  
黃二兩為末鍊蜜杵和分為四丸每以一九酒一升  
煮取二合溫服當下血也 仲景鼈甲煎丸治久瘧

成癖 董炳集驗方治跌撲閃挫用土鼈陰乾一個  
臨時旋研入乳香沒藥自然銅龍骨各等分麝香少  
許為末每服三分入土鼈末以酒調下須先整定骨  
乃服否則接挫也又可代杖

簡誤

無瘀血停畱者不宜用

青魚膽主目暗滴汁目中并塗惡瘡

疏○青魚膽色青象木氣通于肝肝開竅於目故能



能治目暗味苦氣寒能涼血熱故又主塗惡瘡也

主治參互

龔氏易簡方治赤目障翳用黃連熬膏入大青魚膽汁和就再入片腦少許瓶收密封每日點之甚妙

龍木論一切障翳魚膽丸用青魚膽鯉魚膽羊膽牛膽各半兩熊膽二錢龍腦香少許石決明一兩為末蜜丸梧子大每空心茶下十丸 萬氏家抄乳蛾喉痺用膽礬盛青魚膽中陰乾每用少許吹喉取吐

簡誤

目病非風熱盛而由于血虛昏暗者不宜用服朮人不可食青魚肉

石首魚味甘無毒頭中有石如碁子主下石淋磨石服之亦燒為灰末服和蓴菜作羹開胃益氣候乾食之名為蠶灸食之主消瓜成水亦主卒腹脹食不消暴下痢疏○石首魚得海中水土之氣故其味甘氣平無毒胃屬土甘為上化故能開胃胃氣開則飲食增五臟

皆得所養而氣自益矣。乾鯊其性疎利，故能入腸胃，寬中消食，止痢頭中石堅重下走，故主下石淋也。凡泄痢腹痛，與夫腸胃諸疾，惟忌油膩魚腥。惟白鯊不忌，蓋鯊飲鹹水而性平不熱，且無脂膩，不惟少熱中之患，更有消食理脾實腸胃之功也。

鱸魚平補五臟，益筋骨和腸胃，治水氣多，食宜人。

疏○鱸魚秋月方美，其得水中之清氣者乎。味甘淡氣平，雖有小毒，不至發病，乃與脾胃相宜之物也。腎

主骨肝主筋滋味屬陰總歸於臟益二臟之陰氣故  
能益筋骨脾胃有病則五臟無所滋養而積漸流於  
虛弱則水氣泛濫益脾胃則諸證自除矣

神農本草經疏卷二十一

欽定四庫全書

神農本草經疏卷二十二

明 繆希雍 撰

蟲魚部中品

總八十一種今疏其要者十六種

蝦蟆

蟾酥

牡鼠糞

蛤蜊

粉附

蚶殼

附

蚺蛇膽

蛇蛻

白頸蚯蚓

蜈蚣

蛤蚧

水蛭

蟹蚤

田中螺汁

白花蛇

烏蛇附

蜣螂

五靈脂

蝎

鮫鯉甲

蝦蟆味辛寒有毒主邪氣破癥堅血癰腫陰瘡服之不  
患熱病療陰蝕疽癰惡瘡獬犬傷瘡能合玉石一名蟾  
蜍

疏○蝦蟆蟾蜍本是二物經云一名蟾蜍者蓋古人  
通稱蟾為蝦蟆耳經文雖名蝦蟆其用實則蟾蜍也

今世所用者皆蟾蜍而非蝦蟆其功益可見矣稟土  
金之精氣上應月魄性亦靈異其味辛氣寒毒在眉  
稜皮汁中其主癰腫陰瘡陰蝕疽癘惡瘡獠犬傷瘡  
者皆熱毒氣傷肌肉也辛寒能散熱解毒其性急速  
以毒攻毒則毒易解毒解則肌肉和諸證去矣凡瘟  
疫邪氣得汗則解其味大辛性善發汗辛主散毒寒  
主除熱故能使邪氣散而不留邪去則胃氣安而熱  
病退矣破癥堅血者亦以其辛寒能散血熱壅滯也

陶隱居云其肪塗玉則刻之如蠟故云能合玉石近世治小兒疳疾多用以其走陽明而能消積滯也

主治參互

全嬰方五疳保童丸治五疳八痢面黃肌瘦好食泥土不思乳食用大乾蟾蜍一枚燒存性皂角去皮弦一錢燒存性蛤粉水飛三錢麝香一分糊丸粟米大空心米飲下三四十九日二服 鄭氏小兒方走馬牙疳侵蝕口鼻乾蚶蚬黃泥裏固煨過黃連各二錢



半青黛一錢入麝香少許和研傅之 錦囊秘覽附

骨壞瘡久不瘥膿汁不已或骨從瘡孔中出用大蝦  
蟆一箇亂髮一雞子大猪油四兩入二物煎枯去滓  
待凝如膏先以桑根皮烏頭煎湯洗拭乾煨龍骨末  
糝四邊以前膏貼之 醫林集要發背腫毒初起勢  
重者以活蟾一個破開連肚乘熱合瘡上不久必臭  
不可聞再易三四次即愈 袖珍方治風犬傷即用  
蟾蜍後足搗爛水調服之先於頂心拔去血髮三兩

根則小便內見沫也

蟾酥甄權云端午日取眉脂以朱砂麝香丸如麻子  
大治小兒疳瘦每日一丸如腦疳以乳汁調滴鼻中  
日華子云眉酥治蚰牙和牛酥摩傳腰眼并陰囊治  
腰腎冷并助陽氣蘇頌云主蚰牙及小兒疳瘦觀諸  
家所主但言其有消疾殺蟲溫煖通行之功然其味  
辛甘氣溫善能發散一切風火抑鬱大熱癰腫之候  
為拔疔散毒之神藥第性有毒不宜多用入發汗散

毒藥中服者尤不可多

主治參互

同鐵繡桑礪麝香牛黃冰片用金鍼鍼入疔根抹入  
前藥其疔根即爛出 治疔丸同硃砂冰片牛黃明  
礬白殭蠶麝香黃蠟溶化作丸麻子大用葱頭白酒  
吞下取汗不過二三小丸 青囊雜纂拔取疔黃蟾  
酥以麵丸梧子大每用一丸安舌下即黃出也 危

氏方拔取疔毒蟾酥以白麵黃丹搜作劑每丸麥粒

大挑破納入仍以水澄膏貼之 保命集一切瘡毒  
蟾酥一錢白麵二錢硃砂少許井水調成小錠子如  
麥大每用一錠葱湯服汗出即愈如瘡勢緊急用三  
四錠 萬氏家抄凡癰疽發背無名腫毒初起者急  
取蟾酥三五分廣膠一塊米醋一二碗入銚內火化  
開用筆蘸乘熱令人不住手周圍潤之以散為度

簡誤

蟾雖有毒與病無害其眉酥有大毒不宜多服諸家

咸云治小兒疳瘦恐非正治不宜漫用也即用亦嘔  
過者予親見一人因齒痛以蟾酥納牙根誤吞入頭  
目俱脹大而斃即陶注云其皮汁甚有毒犬嚙之口  
皆腫之驗也惟疔腫服之者取其以毒攻毒之義然  
其劑亦甚小不能為害耳外治殊有神効若欲內服  
無過三釐慎毋單使必與牛黃明礬乳香沒藥之類  
同用之乃可如瘡已潰欲其生肌長肉之際得之作  
痛異常不可不知也

牡鼠糞微寒無毒主小兒癩疾大腹時行勞復

兩頭尖者是牡

屎

疏○牡鼠糞本經諸家不言味但云微寒無毒然詳其所自應是苦鹹之物蓋鼠屬水而凡糞必苦者也入足陽明足厥陰經其主小兒癩疾大腹及時行勞復者皆邪熱在陽明也苦寒能除是經之熱所以主之古方治男子陰易腹痛婦人吹乳乳癰皆取其除熱軟堅泄結走肝入胃之功耳

主治叅互

同白芷山茨菇山豆根連翹金銀花蒲公草夏枯草  
貝母橘葉栝樓根紫花地丁牛旁子治乳癰乳岩有  
効 外臺秘要傷寒勞復用雄鼠屎二十枚豉五合  
水二升煮一升頓服活人書加梔子葱白 南陽活  
人書男子陰易及勞復猥鼠屎湯用猥鼠屎兩頭尖  
者十四枚韭白根一大把水二盞煎一盞温服得黏  
汗為効未汗再服 集要方婦人吹奶鼠屎七粒紅

棗七枚去核包屎燒存性入麝香少許溫酒調服并  
治乳癰初起 普濟方大小便秘雄鼠屎末傅臍中  
立効 除傷寒勞復陰易及乳癰乳岩外他用甚稀  
故不著簡誤

蛤蚧冷無毒潤五藏止消渴開胃解酒毒主老癰能為  
寒熱者及婦人血塊煮食之

疏○蛤蚧稟水中之陰氣以生其味鹹氣冷無毒入  
足陽明經五臟皆屬陰得水氣之陰者其性滋潤而



助津液故能潤五臟止消渴開胃也鹹能入血軟堅  
故主婦人血塊及老癍為寒熱也煮食更能醒酒  
蛤粉丹溪云味鹹寒無毒主熱痰溼痰老痰頑痰疝  
氣白濁帶下同香附末薑汁調服主心痛

疏○此即蛤殼煨成粉者其味寒氣寒無毒為諸痰  
證之要藥蓋痰未有不由火氣上炎煎熬津液而成  
鹹能軟堅潤下得之則火自降痰結自消矣疝氣白  
濁帶下皆腎經為病也腎屬水鹹為水化氣類相從

故能入腎以除其所苦也心痛者心虛而熱邪客之也五臟苦欲補瀉云心欲軟急食鹹以軟之此之謂也更有消浮腫利小便散癭核腫毒婦人血塊湯火傷瘡等用

主治參互

普濟方氣虛水腫用大蒜十箇搗如泥入蛤粉丸梧子大每食前白湯下二十九服盡小便下數桶而愈  
潔古方治白濁遺精真珠粉丸用蛤粉煨一斤黃

藥蜜炙一斤為末水跌為丸梧子大每服一百丸空心溫酒下日二次蓋蛤粉味鹹而能補腎陰黃蘗苦而降心火堅腎故也

簡誤

肉氣味雖冷乃與丹石人相反食之令腹結痛穀粉善消痰積血塊然脾胃虛寒者宜少用或加益脾胃藥同用為宜

蚶溫主心腹冷氣腰脊冷風利五藏健脾令人能食又

云温中消食起陽益血色 殼燒過以米醋三度淬後埋令壞醋膏丸治一切血氣冷氣癥癖

疏○蚶得水中之陽氣故其味甘氣温性亦無毒經曰裏不足者以甘補之又曰形不足者温之以氣甘温能益氣而補中則五臟安胃氣健心腹腰脊風冷俱瘳矣胃健則食自消臟暖則陽自起氣充則血自華也殼味鹹走血而栗堅故能治血氣冷氣癥結丹溪用以消血塊化痰積以此也近世糟其肉為侑酒

之物罕有入藥者殼惟關癥癖之外無他用故並不著主治及簡誤

蚘蛇膽味甘苦寒有小毒主心腹蠱痛下部蠱瘡目腫痛

疏○蚘蛇稟火土之氣其膽為甲乙風木之化故其味苦中有甘氣寒有小毒氣薄味厚陰也降也入手少陰足厥陰陽明經心腹蠱痛者蟲在內攻嚙也下部蠱瘡者蟲在外侵蝕也溼熱則生蟲苦寒能燥溼

殺蟲故內外施之皆得也肝開竅於目肝熱則目腫  
痛入肝泄熱則腫痛除矣今人受杖時用此噙化可  
得不死其功能護心止痛使惡血不上薄心有神力  
也

主治參互

同血竭乳香沒藥狗頭骨灰麝蟲天靈蓋象牙末麻  
皮灰丹砂作丸臨杖服一丸護心止痛多杖無害  
聖惠方小兒急疔瘡水調蚺蛇膽傳之 醫方摘要

痔瘡腫痛蚘蛇膽研香油調塗立効 真膽絕難得  
狹長通黑皮膜極薄舐之甜苦別取粟許着淨水中  
浮游水上回行走者為真其徑沈者非也勿多着  
亦沈散也今世惟為受杖人所需餘甚稀使故不著  
簡誤

蛇蛻味鹹甘平無毒主小兒百二十種驚癇瘕癰疾  
寒熱腸痔蟲毒蛇癩弄舌搖頭大人五邪言語僻越惡  
瘡嘔效明目火熬之良

疏○蛇蛻蛇之餘性猶存不以氣味為用者故蛇之性上竄而主風蛻之用入肝而辟惡其性一也小兒驚癇瘕癩疾寒熱蛇癇弄舌搖頭大人五邪言語僻越皆肝經為病邪惡侵犯也蛇蛻走竄能引諸藥入肝散邪故主如上等證善能殺蟲故主腸痔蟲毒惡瘡邪去木平故止嘔欬明目今人亦用以催生去翳膜者亦取其善脫之義也

主治參互



肘後方治小兒頭面瘡蛇蛻燒灰臘猪脂和傅之并  
治小兒月蝕 周密齊東野語云小兒痘後障翳蛇  
蛻一條燒焙天花粉五錢為末以羊肝破開夾藥縛  
定米泔水煮食屢試輒効真竒方也 濟生秘覽治  
橫生逆生須臾不救用蛇蛻一具蟬蛻十四箇髮一  
握竝燒存性分二服酒下仍以小鍼刺兒足心擦鹽  
少許即順并能下胞衣 產乳方婦人吹乳蛇皮一  
尺七寸燒末酒服 千金方諸漏有膿蛇蛻灰傅之

即蟲出 直指方魚臍瘡出水四畔浮漿用蛇蛻燒  
存性雞子清和傅 醫方摘要耳忽大痛如有蟲在  
內奔走或血水流出或乾痛不可忍者蛇蛻皮燒存  
性研細鷺翎吹入即愈

簡誤

小兒驚癇癩疾非外邪客忤而由於肝心虛者不効  
白頸蚯蚓味鹹寒大寒無毒主蛇瘕去三蟲伏尸鬼蛀  
蠱毒殺長蟲仍自化作水療傷寒伏熱狂謬大腹黃疸

症一名土龍

畏葱鹽

疏○蚯蚓得土中陰水之氣故其味鹹寒無毒大寒能祛熱邪除大熱故主伏尸鬼疰及療傷寒伏熱狂謬鹹主下走利小便故治大腹黃疸諸蟲瘕咸屬溼熱所成得鹹寒之氣則瘕自消蟲自去而蠱毒之熱亦解矣昔一道人治熱病發狂用白頸蚯蚓十數條同荊芥穗搗汁與飲之得臭汗而解其為治傷寒伏熱狂謬之明驗也

主治參互

肘後方傷寒熱結六七日狂亂見鬼欲走以大白頸  
蚯蚓半斤去泥用人溺煮汁飲或生絞汁亦可 斗  
門方小便不通因溼而得者用蚯蚓搗爛浸水濾取  
濃汁半碗服立通 勝金方耳卒聾閉蚯蚓入鹽安  
葱內化水點之立効 保命集瘰癧潰爛流串者用  
荊芥根下段煎湯溫洗良久看瘡破紫黑處以針刺  
去血再洗三四次用韭菜地上蚯蚓一把五更時收

取炭火上燒紅為末每一匙入乳香沒藥輕粉各半  
錢穿山甲九片灸為末麻油調傅之神效

簡誤

蚯蚓氣大寒能除有餘邪熱故傷寒非陽明實熱狂  
躁者不宜用溫病無壯熱及脾胃素弱者不宜用黃  
疸緣大勞腹脹屬脾腎虛尸症因陰虛成勞瘵者咸  
在所忌性復有小毒被其毒者以鹽水解之

蜈蚣味辛溫有毒主鬼疰蠱毒噉諸蛇蟲魚毒殺鬼物

老精温瘧去三蟲療心腹寒熱結聚墮胎去惡血赤頭

足者良

一名螂蛆  
一名天龍

疏○蜈蚣稟火金之氣以生故其味辛氣温有毒乃屬陽之毒蟲足厥陰經藥也善能制蛇見大蛇便緣上噉其腦淮南子云騰蛇游霧而殆於螂蛆正指此也故本經主噉諸蛇蟲魚毒及去三蟲蠱毒也性復走竄辟邪所以能療鬼疰温瘧殺鬼物老精辛主散結温主通行故又治心腹寒熱結聚墮胎去惡血也

今世又以之治小兒驚癇風搐臍風口喙與夫癩癧  
便毒痔漏等證皆用之

主治參互

金頭蜈蚣得牛角鯁象牙末猪懸蹄刺蝟皮田螺蛀竹  
屑能去通腸漏管直指方癩瘡一名蛇瘡蠻烟瘡雨  
之鄉多毒蛇氣人有不伏水土風氣而感觸之者數  
月以還必發蛇瘡惟赤足蜈蚣最能伏蛇為上藥白  
芷次之 聖濟總錄云嶺南外蛇瘡一名瑣喉瘡項

大腫痛連喉用赤足蜈蚣一二節研細水下即愈

竒効良方天蛇頭瘡生手指頭上用蜈蚣一條燒烟  
熏一二次即愈或為末猪膽汁調塗之 濟生秘覽

便毒初起蜈蚣一條瓦上焙存性為末酒調服 圖

經治初生小兒口噤不開不能乳者用赤足蜈蚣去  
足炙研末以猪乳二合調半錢分三四服温灌之効

簡誤

蜈蚣性有毒善走竄小兒慢驚風口噤不言大人温



瘧非烟鬱瘴氣所發心腹積聚非蟲結蛇瘕便毒成  
膿將潰咸在所忌性畏蛄蚰不敢過其所行之路能  
啣人痛甚以蛄蚰搗塗之痛立止蜈蚣能治龍蛇而  
反畏蛄蚰蜘蛛即莊子所謂物畏其天陰符經所謂  
禽之制在氣也凡使勿用千足蟲真相似但蜈蚣腰  
中一段無脚所以能掬而彈遠為異又云頭上有白  
肉面並嘴尖可別若誤用并把着腥臭氣入頂能殺  
人也

蛤蚧味鹹平有小毒主久肺勞傳尸殺鬼物邪氣療咳嗽下淋瀝通水道生嶺南山谷及城牆或大樹間身長四五寸尾與身等形如大守宮一雌一雄常自呼其名曰蛤蚧最護惜其尾或見人欲取之多自嚙斷其尾人即不取之凡採之者須存其尾則用之力全故也

疏○蛤蚧得金水之氣故其味鹹氣平有小毒入手太陰足少陰經其主久肺勞傳尸鬼物邪氣欬嗽淋瀝者皆肺腎為病勞極則肺腎虛而生熱故外邪易

侵內證兼發也蛤蚧屬陰能補水之上源則肺腎皆  
得所養而勞熱咳嗽自除邪物鬼氣自去矣肺調百  
脉通調水道下輸膀胱肺氣清故淋瀝水道自通也  
又顧玠海槎錄云廣西橫州甚多蛤蚧牝牡上下相  
呼累日情洽乃交兩相抱負自墮於地人往捕之亦  
不知覺以手劈分雖死不開乃用熟稿草細纏蒸過  
曝乾售之煉為房中之藥甚効尋常捕者不論雌雄  
但可為雜藥用

主治參互

寇氏行義治久嗽不愈肺積虛熱成癰出膿血曉夕  
不止喉中氣塞胸膈噎痛用蛤蚧阿膠鹿角膠犀角  
羚羊角各二錢半用河水三升銀石器內文火熬至  
半升濾汁時時仰臥細呷日一服

簡誤

咳嗽由風寒外邪者不宜用雷公曰其毒在眼須去  
眼及甲上尾上腹上肉毛以酒浸透隔兩重紙緩焙

令乾以甕器成懸屋東角上一夜用之力可十倍勿傷尾

水蛭味鹹苦平微寒有毒主逐惡血瘀血月閉破血瘕

積聚無子利水道又墮胎

俗名馬蟻

疏○水蛭生於溪澗陰溼之處其味鹹苦氣平有大毒其用與畜蟲相似故仲景方中往往與之竝施鹹入血走血苦泄結鹹苦並行故治婦人惡血瘀血月閉血瘕積聚因而無子者血畜膀胱則水道不通血

散而膀胱得氣化之職水道不求其利而自利矣墮胎者以其有毒善破血也

主治參互

入抵當湯治傷寒畜血下焦因而發狂 入大黃廔  
蟲丸兼治虛勞骨蒸咳嗽內有乾血皮膚甲錯 入  
鼈甲煎丸消瘧母已上皆仲景方 古今驗錄方墜  
跌打擊內傷神効水蛭一兩燒令煙出為末入麝香  
一兩每酒服一錢當下畜血未止再服其效如神

簡誤

水蛭芒蟲皆破逐瘀血血瘀發病之惡藥而水蛭入  
腹燬之若尚存性尚能變為水蛭嚙人腸臟非細故  
也破瘀消血之藥儘多正足選用奚必用此難制之  
物戒之可也如犯之以黃泥作丸吞之必入泥而出

蟹螯味辛寒有毒主寒熱鬼疰蠱毒鼠瘻疥癬惡瘡疽

蝕死肌破石癰血積傷人肌墮胎

馬刀為之使畏巴  
豆丹參坐青甘草

疏○蟹螯稟火金相合之氣故其味辛氣寒扁鵲云

有大毒近人肌肉則潰爛毒可知矣入手陽明手太陽經性能傷肌肉蝕死肌故主鼠瘻疽瘡疥癬辛寒能走散下泄故主破石癰血積及墮胎也至於鬼疰蠱毒必非極辛大毒之藥所能療此本經之誤甄權主癰癰通利水道以其能追逐腸胃垢膩復能破結走下竅也

主治參互

治癰癰用肥皂二斤去核每肥皂一莢入蟹螯四枚



線縛蒸取出去蟹螯并肥皂皮筋得淨肉十兩八貝  
母二兩栝樓根元參甘草薄荷葉各一兩五錢共為  
末以肥皂搗如泥為丸梧子大每服一錢白湯吞服  
後腹疼勿慮此藥力追毒之故 治癩犬咬方用蟹

螯七箇去頭足並翅酒洗和溼糯米銅杓內炒米熟  
為度隨將二物研成細末加六一散三兩分作七服  
每清晨一服白湯調下本人頭頂心必有紅髮二三  
根要不時尋覓拔去 經驗方內消瘰癧不拘大人

小兒用蟹螯一兩去頭足翅以粟米一升同炒米焦  
去米入薄荷四兩為末烏雞子清丸如菘豆大空心  
臘茶下三丸加至五丸却每日減一丸減至一丸後  
復日增一丸以消為度

簡誤

蟹螯性有大毒能潰爛人肌肉惟癩癧癩犬咬或可  
如法暫施此物若燉之存性猶能嚙人腸胃發泡潰  
爛致死即前二證亦不若用米同炒取氣而勿用質

為穩餘證必不可餌切戒切戒

田中螺汁大寒主目熱赤痛止渴

疏○田螺產於水田中稟水土之陰氣故其汁大寒  
味應甘性無毒陶隱居以真珠黃連末內入良久取  
汁點目痛神効以其寒能除熱也解一切有餘之熱  
故能止渴及醒酒

主治參互

丹溪方治噤口痢疾用活大田螺二枚搗爛入麝香

三分作餅烘熱貼臍間半日熱氣下行即思食矣甚效 又方治小便不通腹脹如鼓用田螺一枚鹽半匕搗傅臍下一寸三分即通 經驗方大腸脫肛墜下三五寸者用大田螺二三枚將淨水養去泥用雞爪黃連研細末入靨內待化成水以膿茶洗淨肛門將雞翎蘸水刷之以軟帛托上自然不再發也 乾坤生意痔漏疼用田螺一箇入龍腦一分在內取水搽之効

簡誤

目病非關風熱者不宜用

白花蛇味甘鹹溫有毒主中風溼痺不仁筋脉拘急口

面喎斜半身不遂骨節疼痛大風疥癩及暴風搔癢脚

弱不能久立一名褰鼻蛇白花者良

出蘄州龍頭虎口  
黑質白花目開如

生尾有爪甲  
真斷產也

疏○白花蛇生於土穴陰霾之處稟幽暗毒厲之氣

故其味雖甘鹹性則有大毒也經曰風者百病之長

善行而數變蛇性走竄亦善行而無處不到故能引諸風藥至病所自腑臟而達皮毛也凡癩風疥癬喝僻拘忌偏痺不仁因風所生之證無不藉其力以獲瘥本經著其功能信非虛矣

主治參互

同苦參何首烏葳靈仙鼈蝨胡麻天門冬百部豨薟漆葉刺蒺藜治癩風半遍身頑痺疥癬 醫壘元戎驅風膏治風癰癩風遍身疥癬用白花蛇肉四兩酒

潤炙乾天麻七錢半薄荷荊芥各二錢半為末好酒  
二升蜜四合石器熬成膏每服一盞溫湯服日三服  
急於暖處出汗十日効 瑞竹堂經驗方白花蛇酒  
治諸風癘癰用白花蛇一條酒潤去皮骨取肉絹袋  
盛之蒸糯米一斗安麴於缸底置蛇於麴上以飯安  
蛇上用物密蓋三七日取酒以蛇曬乾為末每服三  
五分溫酒下仍以濁酒並糟作餅食之尤佳 潔古  
白花蛇散治大風病白花蛇烏梢蛇各取淨肉二錢

酒炙雄黃二錢大黃五錢為末每服二錢白湯下三  
日一服

烏蛇即烏梢蛇氣味所主經白花蛇同第性善無毒

耳修事亦同不復載

色黑如漆尾細  
有劔脊者良

### 簡誤

白花蛇性走竄有毒癘風疥癬頑痺等證誠為要藥  
然而中風口面喎斜半身不遂定緣陰虛血少內熱  
而發與得之風溼者殊科非所宜也醫師宜辨之頭



尾並骨俱有大毒須盡去之

蠃娘味鹹寒有毒主小兒驚癇瘈瘲腹脹寒熱大人癩

疾狂易

音羊

手足端寒支滿賁豚

疏○蠃娘稟陰溼之氣以生故其味鹹氣寒有毒入足厥陰手足陽明經小兒驚癇瘈瘲腹脹寒熱大人癩疾狂易皆肝胃大腸三經風熱壅盛所致鹹寒除三經之邪熱則諸證自瘳別錄主手足端寒支滿者以脾胃主四支而治中焦脾氣結滯則血液不能通

行灌漑於手足胃家熱壅及大腸結實則中焦不治而氣逆支滿行三經之壅滯則所苦減除矣鹹能軟堅入腎故又主賁豚也古今方書以之治一切痔瘻及丁腫疔瘡出箭鏃之用

主治參互

本事方推車散治大小便經月不通欲死者用推車客七箇男用頭女用身螻蛄七箇男用身女用頭新瓦焙研末用虎目樹南向皮煎汁調服只一服立通

一方大腸脫肛蠅蝗燒存性為末入冰片研勻摻  
上托之即入 唐氏方腸漏出水用蠅蝗一枚陰乾  
入冰片少許為細末紙撚蘸末入孔內漸漸生肉藥  
自退出即愈 劉涓子方附骨疽瘡蠅蝗七枚同大  
麥搗傅 廣利方無名惡瘡忽得不識者用蠅蝗杵  
汁塗之 劉禹錫纂柳州救三死方云元和十一年  
得丁瘡凡十四日益篤善藥傅之莫救長慶賈方伯  
教用蠅蝗心一夕百苦皆已明年正月食羊肉又大

作再用如神驗其用蠅蝗心在腹下度取之其肉稍  
白是也貼瘡半日許再易血盡根出即愈蠅蝗畏羊  
肉故食之即發其法蓋出葛洪肘後方 楊氏家藏  
方箭鏃入骨不可移者用巴豆微炒同蠅蝗搗塗斯  
須痛定必微癢忍之待極癢不可忍乃撼動拔之立  
出凡諸癢皆可療也 搗為丸塞下部引痔蟲出盡  
永差

簡誤

蟻娘有毒外用易臻厥功內服非虛人所宜非不得已勿輕試

五靈脂味甘溫無毒主療心腹冷氣小兒五疳辟疫治腸風通利氣脈女子月閉出北地此是寒號蟲糞也

疏○寒號蟲畏寒喜煖故其糞亦溫味甘而無毒氣味俱厚陰中之陰降也入足厥陰手少陰經性專行血故主女子血閉味甘而溫故療心腹冷氣及通利氣脈也其主小兒五疳者以其亦能消化水穀治腸

風者取其行腸胃之瘀滯也凡心腎血氣刺痛婦人  
產後少腹兒枕塊諸痛及瘀挾血成窠囊血凝齒痛  
諸證所必須之藥

主治參互

同澤蘭牛膝益母草延胡索牡丹皮紅花赤芍藥山  
查生地黃治產後惡露不盡腹中作疼加桃仁其効  
更速勿過劑 同番降香紅麴川通草紅花延胡索  
韭菜童便治胃脘瘀血作痛 同木香烏藥治周身

血氣刺痛 和濟局方失笑散治男女老少心痛腹  
痛少腹痛並少腹疝氣諸藥不効者能行能止婦人  
妊娠心痛及產後心痛少腹痛血氣痛尤妙用五靈  
脂蒲黃等分研末先以酒二盃調末熬成膏入水一  
盞煎至七分連藥溫服未止再服一方以酒代醋一  
方以醋糊丸童便酒服 楊氏產乳方紫金丸治產  
後惡露不快腰痛少腹如刺時作寒熱頭痛不思飲  
食又治久有瘀血月水不調黃瘦不食亦療心痛功

與失笑同以五靈脂水搗淨炒末一兩以好米醋調  
稀慢火熬膏入真蒲黃末和丸龍眼大每服一丸以  
水與童便各半盞煎至七八分溫服少頃再服惡露  
即下血塊經閉者酒磨服之 圖經產後血暈不知  
人事用五靈脂二兩半生半炒為末每服一錢白水  
調下如口噤者斡開灌之入喉即活 丹溪方產後  
腹痛五靈脂香附桃仁等分研末醋糊丸服一百丸  
白朮牛膝陳皮湯下 事林廣記卒暴心痛五靈脂



炒一錢半乾薑炮三分為末熱酒服立愈 產寶方  
胎衣不下惡血衝心用五靈脂半生半炒研末每服  
二錢溫酒下 百一選方痰血凝結紫芝丸用五靈  
脂水飛半夏湯泡等分為末薑汁浸蒸餅丸梧子大  
每米飲下三十九 夏子益竒疾方血潰怪病凡人  
眼中白珠渾黑視物殊常毛髮堅直如鐵條能飲食  
而不語如醉名曰血潰以五靈脂為末湯服二錢即愈

簡誤

五靈脂其功長於破血行血故凡瘀血停滯作痛產後血暈惡血衝心少腹兒枕痛留血經閉瘀血心胃間作痛血滯經脈氣不得行攻刺疼痛等證在所必用然而血虛腹痛血虛經閉產婦去血過多發暈心虛有火作痛病屬血虛無瘀滯者咸所當忌

蝎味甘辛有毒療諸風癱瘓及中風半身不遂口眼喎斜語澇手足抽掣形緊小者良

疏○蝎稟火金之氣以生本經味甘辛有毒然察其

用應是辛多甘少氣溫入足厥陰經諸風掉眩屬肝木風客是經非辛溫走散之性則不能祛風逐邪兼引諸風藥入達病所也故大人真中風小兒急驚風皆須用之

主治參互

全幼心鑑小兒臍風宣風散治小兒初生斷臍後傷風唇青口撮出白沫不乳用全蝎二十一箇無灰酒塗灸為末入麝香少許每用金銀煎湯調半字服之

經驗方大人風涎用蝎一箇頭尾全者以薄荷四  
葉裏定火上炙焦同研為末作一服白湯下小兒驚  
風分四服如前服 得胡桃同煨共研黃耆金銀花  
湯下治橫痃不收口

簡誤

蝎風藥也似中風及小兒慢脾風病屬於虛法咸忌  
之

鯪甲微寒主五邪驚啼悲傷燒之作灰以酒或水和

方寸匕療蟻瘻

疏○鮫鯉甲穿山穴居其性善走味辛平氣微寒有毒入足厥陰兼入手足陽明經邪魅着人則驚啼悲傷不已辛主散則邪魅去驚啼悲傷止矣喜食蟻又能入大腸故療蟻瘻蟻瘻者即世人所云漏也性走能行瘀血通經絡故又有消癰毒排膿血下乳和傷發痘等用


主治參互

鯪鯉甲俗名穿山甲土炒同乳香沒藥番降香紅麴  
山查川通草童便治上部內傷胸膈間疼痛 同當  
歸白芷金銀花連翹紫花地丁夏枯草牛旁子乳香  
沒藥甘草貝母皂角刺治癰腫未潰資為引導 佐  
地榆治便毒 直指方治鼠痔成瘡腫痛用穿山甲  
尾尖處一兩煨存性鼈甲酥炙一兩麝香半錢為末  
每服一錢空心茶下 又方乳汁不通涌泉散用穿  
山甲炮研末酒服方寸匕日二服外以油梳梳乳即

通 又方便毒便癰穿山甲半兩猪苓二錢並以醋  
炙研末酒服二錢 得紫草生犀角生地黃治痘瘡  
毒盛不得起發色帶乾紅枯燥者有功

簡誤

癰疽已潰不宜服痘瘡元氣不足不能起發者不宜  
服



神農本草經疏卷二十二